

尚

書

辨

解

尚書辨解卷八

呂刑

呂刑者。呂侯爲穆王司寇。王命之訓刑。以誥四方也。說者謂穆王巡遊無度。鬻獄以供侈費。不可爲訓。非也。今讀其辭。謂蚩尤妖妄。苗俗信鬼。淫刑自滅。古帝隆典。弼教制刑。惟中。元命配天。前此訓誥所未發。卽夫子務民義遠鬼神。懷德懷刑之意。蓋天壤之間。惟此民彝。王者明刑敕法。善有賞。惡有罰。馭世之常典也。姦宄譸張。惑世誣民。謂禍福可倖免。命討不在天。威福不由上。邪說橫行。徂詐相欺。人心以蔽。風俗以

滴蚩尤所以猖狂苗民所以妄作也故夫子曰非其  
鬼而祭之諂也見義不爲無勇也語不及神怪教不  
越中庸正人心息邪說所以爲明刑弼教之大端成  
穆穆明明之化者也呂命及此焉得以人廢言自三  
代之盛也訓辭必稱卜筮比其衰也卜筮亦疑周之  
盛也訓誥必誦祖德比其衰也祖德亦玩呂命遠引  
三后而禁黜詛盟亦申命之權也至于刑獄之際丁  
寧反覆藹然仁人惻怛之心蓋五刑出于五兵五兵  
始于蚩尤蚩尤妖妄尚鬼喜殺始造兵器慘虐害民  
軒轅誅之其遺類爲三苗淫用五刑虞舜殺之宥五

刑爲三居。是五刑之不用。自舜然矣。夏商以來。治亂迭興。兵獄相尋。勢不得盡廢五刑。而犯法者多。聖人焉能并五刑去之。故事有作于亂人。始于夷狄。而不能盡廢者。佛教與肉刑是也。迄于周興。天下初定。反者四起。周公破斧缺斨。再世不定。故五刑不得不用。其屬至于二千五百。周之法令。視前代加密。時使之然耳。觀大誥康誥立政諸書。聖人亦兢兢慮末流之無已。康王以後。五刑之屬。遂多至三千。穆王乃作辟刑。其真仁人之心哉。儒者謂肉刑爲先王之法。夫割人肢體。無異屠牲。先王豈忍爲此。旣謂不能盡去。而

擇其疑者贖之贖又疑者赦之不實者無聽可謂曲  
當矣有罪必刑而全活亦多所以穆王享國長久壽  
年百有餘歲不可謂非仁人之報而儒者必以爲先  
王之法不許廢又不許贖嗚呼此豈聖人錄祥刑之  
意鄙儒所以爲固執而不通也

惟呂命王享國百年

句耄音冒

荒度

託

作刑以誥四方

此節史臣記作訓之故呂侯爲王司寇王命之作  
誥以告四方也呂後封于甫故亦謂之甫刑命辭命  
王穆王名滿年過四十始卽位在位五十五年享國  
百年者史臣約壽歲通言之也八十九十曰耄作呂

刑時王年已耄也荒大也度量也作刑作贖刑也呂伯恭曰世衰則情偽繁人老則經歷熟穆王之時姦宄日勝作書于耄年閱世故察物情者熟矣古今犴獄言之畧盡其哀矜明練爲用刑者所宜盡心故夫子存之以示後世愚按此言最近或謂老耄荒憤作訓者過也

王曰若古有訓蚩尤惟始作亂延及于平民罔不寇賊鴟義姦宄奪攘矯虔苗民弗用靈制以刑惟作五虐之刑曰法殺戮無辜爰始淫爲劓又刵二殛捉黥擊越茲麗刑并制罔差次平有辭民興胥漸尖泯泯勢勢罔

中于信以覆詛盟虐威庶戮方告無辜于上上帝監民  
罔有馨香德刑句發聞惟腥皇帝哀矜庶戮之不辜報  
虐以威遏絕苗民無世在下乃命重黎絕地天通罔有  
降格羣后之逮在下句明明棐常鰥寡無蓋皇帝清問  
下民鰥寡有辭于苗德威惟畏德明惟明乃命三后恤  
功于民伯夷降典折民惟刑禹平水土主名山川稷降  
播種農殖嘉穀三后成功惟殷于民士制百姓于刑之  
中以教祗德穆穆在上明明在下灼于四方罔不惟德  
之勤故乃明于刑之中率乂于民棐彝典獄非訖于威  
惟訖于富敬忌罔有擇言在身惟克天德自作元命配

在下

此節敘五刑所由始。在古清明之世，常道立而風俗醇，民無邪慝，循理樂生，上懸法而示之下，緣法而守之，無昏淫之行，無慘刻之政。至于季世，姦宄嗣興，譁張爲刃，邪說誣民，變常亂紀，五兵五刑所由作也。蚩尤，古妖人，九黎之君，鴟妖鳥，鴟義猶言凶德。人道好生，鬼道好殺，矯虔強殺也。苗，民苗國之民，蚩尤之遺種，靈善也。言三苗之君不以善治其民，作五虐之刑，自稱爲常法也。劓，割鼻；剕，割耳；椓，斷陰；黥，刺面。皆五刑之屬。始淫放爲此刑，後遂泛濫，麗刑者並制，不分。



有辭無辭蓋獄有辭則直無辭乃屈也胥漸相染也  
泯泯焚焚昏亂之象罔中于信上下相詐也以覆詛  
盟爲詛盟以自掩也虐威庶戮上用虐威衆庶被刑  
戮也德刑猶康誥所謂義刑義殺也發聞猶升聞也  
惟腥惟刑惡腥穢也皇帝謂上皇古帝如軒轅征蚩  
尤顓頊蚩九黎舜遷三苗宥五刑皆是也報虐以威  
謂蚩尤三苗暴虐皇帝治之以威也無世在下無遺  
種在下國也重黎二官名義和之後重司天主治曆  
明時及祭祀鬼神之事黎司地主辨方正俗體國經  
野之事蚩尤能興雲致霧飛騰變化苗俗效之如所

謂天神降人昇天禱祀符詛之術以扇惑愚俗故聖人設官分職燮理幽明辨別人鬼經紀天地息邪詭以宣正教布彝常于天下也罔有降格者言百神秩祀典禮脩明非其鬼而祭之則神不至也羣后之逮在下者天下諸侯及臣民也明明清明也棐常猶言靡常政治昭明善則賞惡則罰無偏主也鰥寡無蓋言窮民隱情皆得上達也清問理其寃也有辭于苗謂無罪而陷于苗人五虐之刑者皆得辯訴也德威德明以德治民而民畏服也三后三君謂伯夷禹稷也伯夷爲舜秩宗降其典禮以折民之邪僻爲之儀

刑所謂齊之以禮也。殷當也。言皆務教養。體當民情。不貴刑殺也。士獄官。制刑齊民。合于中道。以教民。祇敬于德。非專用刑也。穆穆以下。贊聖治。穆穆君德之和也。明明臣職之清也。灼光也。惟德之勤。以德勤民也。如是而猶有匪彝者。然後明于刑之中。率循而久治之。棐彛猶言亂常。典獄司刑也。訖猶及也。言法非但訖于可威者。謂小民也。惟訖于富者。謂豪右也。敬忌者。中心敬謹。畏忌制獄之本也。罔有擇言在身。謂公平無私在己者。皆可告人。不須擇而後言也。是能合天德。自立生命。配享上帝在下國也。元始生也。天

道好生司刑者能重民命是自爲元始造命配天受  
享也

王曰嗟四方司政典獄非爾惟作天牧今爾何監非時  
伯夷播刑之迪其今爾何懲惟時苗民匪察于獄之麗  
罔擇吉人觀于五刑之中惟時庶威奪貨斷制五刑以  
亂無辜上帝不蠲降咎于苗苗民無辭于罰乃絕厥世  
再約上文申戒也司政典獄呼四方諸侯也言非爾  
爲天之民牧乎爾今何監非是伯夷播禮惟刑之事  
當迪行乎爾今何懲惟是苗民不察于獄之麗不擇  
善人不觀五刑之中惟是庶民則威虐偏奪于富者

商書辨解 卷八  
之貨賄而以私意斷制五刑橫治無罪故上帝乃不  
蠲潔其所爲降咎于苗無辭于罰以絕世耳是乃所  
當懲也

王曰嗚呼念之哉伯父伯兄仲叔季弟幼子童孫皆聽  
朕言庶有格命今爾罔不由慰日勤爾罔或戒不勤天  
齊于民俾我一日非終惟終在人爾尚敬逆天命以奉  
我一人雖畏勿畏雖休勿休惟敬五刑以成三德一人  
有慶兆民賴之其寧惟永

此教以聽獄當勤而敬也父叔兄弟子孫徧呼諸侯  
及典獄羣臣也庶有格命言庶幾有感悟爾之誥命

望其見聽也由從也慰安也勤鞠獄勤勞也由其心  
本求安不厭詳慎誠意懇到自無冤獄此忠信之長  
可法也故曰罔不由慰日勤若有所戒而爲勤勉強  
欲速躁急任情惟求集事不顧民命此搏擊之吏不  
可爲也故曰罔或戒不勤天齊于民言刑法天所以  
整齊下民天不自刑以權俾我聽斷于一日之間生  
死出入所係甚重故刑可一日齊而民苟自新未可  
以一日終也非終者始誤也惟終者不悛也此兩者  
尚存乎人未可輕齊畏猶威也休猶寬也雖畏勿畏  
雖休勿休者言刑本威罪作意爲威則過嚴寬雖休

美作意爲休則過縱畏勿畏休勿休惟其敬耳三德  
謂剛柔正直卽無畏無休也一人謂君也如是則君  
有福慶衆民倚賴安寧長久之道也

王曰吁來有邦有土告爾祥刑在今爾安百姓何擇非  
人何敬非刑何度託非及兩造具備師聽五辭五辭簡  
孚正于五刑五刑不簡正于五罰五罰不服正于五過  
五過之疵惟官惟反惟內惟貨惟來其罪惟均其審克  
之五刑之疑有赦五罰之疑有赦其審克之簡孚有衆  
惟貌有稽無簡不聽具嚴天威墨辭疑赦其罰百緩遷  
閔實其罪劓辟疑赦其罰惟倍閔實其罪剕辟疑赦其

罰倍差

次平聲

閱實其罪。官辟疑赦。其罰六百。鍰閱實其

罪。大辟疑赦。其罰千鍰。閱實其罪。墨罰之屬千。劓罰之

屬千。剕罰之屬五百。宮罰之屬三百。大辟之罰。其屬二

百。五刑之屬三千。上下比罪。無僭亂辭。勿用不行。惟察

惟法。其審克之。上刑適輕。下服。下刑適重。上服。輕重諸

罰。有權。刑罰世輕世重。惟齊非齊。有倫有要。罰懲非死

人。極于病。非佞折獄。惟良折獄。罔非在中。察辭于差。非

從。惟從。哀敬折獄。明啟刑書。胥占。咸庶中正。其刑其罰。

其審克之。獄成而孚。輸而孚。其刑上備。有并兩刑。

此告以所制祥刑也。何擇非人。言所當擇者莫如人。



何敬非刑言所當敬者莫如刑何度非及言所當揆  
度者莫如刑獄之及也及卽康誥我惟有及之及言  
不過求也兩造謂兩人爭訟者皆造庭也具備辭證  
皆在也師聽衆人公聽也五辭五刑之辭罪人所吐  
情由合于五刑者也簡精核也孚切合也正比當也  
不簡謂有疑也五罰罰金以贖五刑情真律允者刑  
之有疑則使贖也過誤也所謂眚災當肆赦者也不  
當赦而赦則司刑者之病謂之疵官權貴也反報恩  
也內女謁也貨賄賂也來請求也其罪惟均卽以罪  
人之罰罰司刑者審克審慎克治勿忽勿怠也刑疑

有赦卽正于五罰也。罰疑有赦卽正于五過也。簡孚有衆謂兩造師聽以衆爲信也。惟貌有稽謂衆心服否。觀色可知也。無簡不聽謂兩辭皆虛誕無可簡核則置不聽也。具嚴天威謂上帝臨汝也。凡五刑必簡孚無疑情雖當而微有可疑則赦其刑而罰金因輕重爲多寡也。六兩曰鍰二十四銖曰兩蓋銅錢之屬古錢以五銖爲中百鍰約錢二千八百八十文餘可推也。閹實者閹視入金之數實滿所犯之罪也。墨者刻額而涅之其刑輕故罰止百鍰。劓割鼻罰倍二百鍰也。剕足倍差者加倍又差過之。宮刑男子割勢。

女子幽閉也大辟離其身首也屬者所犯之事不同  
刑皆類也上下比罪如比于大辟不足比于宮有餘  
之類律無正條比引用之易于僭亂辭謂獄辭附會  
文致與情相違卽僭亂也勿用不行謂律雖當用而  
情禮時勢難行則勿用也蓋用而不得行所損必多  
不得行而必行所傷亦多惟精察之法乃可行上刑  
適輕以下六句申詳上下比罪無僭亂辭之意上刑  
適輕謂律雖重而情則輕如殺人者死殺奴婢則輕  
之類下服者不可強比于上也下刑適重謂律雖輕  
而情則重如竊財者徒而監守自盜則死之類上服

者不得強比于下也。服被也。如衣之被于身。妥帖之意。輕重諸罰。謂五刑之贖。鍰有權。謂三千之屬。上下出入。稱情平施。所謂律設大法。禮順人情。但存哀矜敬畏之念。卽是輕重上下之權。世輕世重。謂刑罰有古宜輕。在今宜重。有古宜重。在今宜輕者。如新國宜輕。亂國宜重。平國宜中。繼猛宜寬。濟寬宜猛之類。惟齊非齊。謂律本齊。民用之又當緣情差等。不可一切強齊也。有倫理有樞要。然後可與權。而上下輕重得齊。非齊之意矣。罰懲非死人。極于病。謂罰贖雖不至死。而人已困極。亦不可忽。佞者折獄之口才。良者恤

刑之善心良則無罰不中矣察辭于差非從惟從謂嚴刑之下何求不得亦有非所從而屈從者俗謂逼招也如此者其辭參差須審察也本其哀敬之心明啟刑書與衆相占度勿隱勿偏庶幾于中平正直矣獄成而孚謂刑罰既定情罪允合也輸而孚謂罪人亦自輸服無不平之恨乃爲真孚其刑上備有并兩刑謂如一人犯墨又犯劓旣劓免墨之類按墨劓荆宮大辟五者五刑各舉其一耳他如所謂刖者割耳也殛斫也斷手足趾之類皆所謂五虐之刑也取生人肌膚而鮮割之與炮烙剖心剔孕之爲何異誠妖

人苗俗之事。故舜宥之爲五流。惟怙終則殺。經有明徵。可信。而俗儒執以爲先王之法。嗚呼。何可以累先王也。不以生割爲慘。而以罰贖爲貪。表已之廉潔。而輕人之死命。是誠何心。然則三代聖人不除五刑者。何世之亂也。旣不能偃五兵焉。能廢五刑。聖人雖不除之。然不輕用之。故康誥大誥。若是兢兢爾。逮穆王時。天下承平久。獄吏僭用。乃作祥刑。簡其疑者。贖不疑者。刑非廢刑也。不得謂之養姦。過則赦。疑則贖。非盡贖也。不得謂之濫罰。儒者必不許贖。是申韓自儒者始耳。烏可以累先王也。

王曰嗚呼敬之哉官伯族姓朕言多懼朕敬于刑有德  
惟刑今天相民作配在下明清于單辭民之亂罔不中  
聽獄之兩辭無或私家于獄之兩辭獄貨非寶惟府辜  
功報以庶尤未畏惟罰非天不中惟人在命天罰不極  
庶民罔有令政在于天下

此申戒羣臣也官伯官長也族姓諸侯大夫各有族  
有姓朕言多懼謂刑罰民命所係言之且多懼而用  
可知也有德惟刑卽德威惟畏之意天相民謂天所  
扶助在民也作配在下謂配合天意在下國之爲君  
臣者也單辭逐一清問之辭兩辭兩造爭勝負之辭

單辭清明而後兩辭可折中也。亂治也。截渡曰亂訟者紛爭上欲亂決之。惟以無偏倚之心中聽于兩辭。無以有護庇之心。私家于兩辭則可矣。私家者納其貨于家私庇之也。獄貨非實以下儆戒之辭。惟府辜功。謂聚罪以爲功也。報以庶尤。謂降之百殃也。永畏惟罰。謂極可畏。惟刑罰也。非天不中。謂人若不奉天以折獄。未有能中者。惟人在命。謂人命至重也。天罰不極。謂枉罰。天必報以庶尤。而極致其罰。必然之理也。如天罰不極。則酷吏無忌憚。而庶民可妄殺納賄。行私無所不至。安得復有善政在天下哉。



王曰嗚呼嗣孫今往何監非德于民之中尚明聽之哉  
哲人惟刑無疆之辭屬于五極咸中有慶受王嘉師監  
于茲祥刑

此戒來世也今往何監言自今以往當何所監豈非  
立德于民之中乎民之中卽民之心剛柔正直卽中  
也用中莫大于刑明哲之人惟于刑罰丁寧告戒致  
無窮之辭于後世以屬望于五刑之極極卽中也使  
用刑者皆中則有福慶矣嘉師善衆也猶言良民謂  
爾嗣孫受王之善衆其視于今所告之祥刑乎嗟夫  
能視罪人爲嘉師則犴獄皆祥刑矣

# 文侯之命

初周幽王娶申女爲后生太子宜臼又嬖褒姒而黜  
申后廢宜臼申侯率大戎殺幽王而西周亡晉文侯  
與申侯共立宜臼于洛爲平王平王德晉侯而錫之  
命此其命辭也夫子刪書錄此何也蓋方太子被黜  
依申申侯與大戎謀殺王太子不知乎詩云螟蛉有  
子果羸負之是申侯之爲果羸也太子明知之矣知  
之而不能救則當赴難死不死則當終身不有位今  
殺其父據其位而歸德于立已者天理民彝絕矣文  
武之岐豐一朝淪爲腥土夫豈偶然之故昔夏商有

天下五六百年不爲不久以桀紂之虐亡之以文武  
周公之聖取之而不足何者天理民彝在故其時孤  
竹首陽東郊之多士猶足以維旣絕之命周自幽王  
上距文武纔二百五十七年數聖人培植之業一朝  
淪落如瓦解無他天理民彝盡也故其時有如申侯  
者爲之濟惡國破家亡父死賊手千年堂構一朝捐  
棄不思枕戈興復而喋喋效成周泰平文辭可謂渙  
忍無爲之甚者而晉侯亦覲面受之未有討賊復讐  
之効抑何以匡天子答寵命哉紀綱廢弛虛文粉飾  
所以爲四代之絕簡春秋繼此而作矣說者謂聖人

于平王致屬望之意嗟夫賊父之子欲以何望或謂  
法語舊典一二未泯今乍誦其辭則似而繹其旨則  
支遁援引文王失類自敘遭亂欲隱諱而其情屈頌  
文侯功德欲張大而其辭窮無大詰康誥意滿口重  
之味學者可按覆而得也又稱臣不名而以字不伯  
叔而直父之祖之名不正言不順前此訓誥未之有  
也易曰聖人之情見乎辭大誥以下諸篇是也又曰  
中心慙者其辭枝失其守者其辭屈文侯之命是也  
亦猶二雅之召是何草不黃姑存此以稽世變云爾  
如謂能言文武之舊則自呂刑後百餘年間若宣王

中興南征北伐豈無訓誥足采者而獨存此乎學者亦可以思矣

王若曰父義和不顯文武克愼明德昭升于上敷聞在下惟時上帝集厥命于文王亦惟先正克左右昭事厥辟越小大謀猷罔不率從肆先祖懷在位

父同姓之稱義和文侯字名仇天子命諸侯而不名命可知矣丕顯文武言文侯能大明天武之德昭布于上下也獨稱文王者豈以其嘗爲西伯今亦命文侯爲伯與先正文王諸臣先祖卽文王也懷安也嗚呼閔予小子嗣造天丕愆殄資澤于下民侵戎我國

家純卽我御事罔或者壽俊在厥服予則罔克曰惟祖  
惟父其伊恤朕躬嗚呼有績予一人永綏在位

造天丕愆遭天降大亂也殄資澤殄絕資生惠澤也  
戎兵寇也純猶全也卽就也與集通言多難并集治  
事諸臣皆遭時不利無老成英傑共事已不克勝也  
祖父指同姓諸侯之尊者其伊恤朕躬言誰肯憂恤  
我也又歎息言有能績理予一人使永安在位者乎  
嗟夫驪山之禍東遷之役其誰爲之觀于此言而知  
平王之志在得位而已

父義和汝克昭乃顯祖汝肇刑文武用會紹乃辟追孝

于前文人汝多脩扞我于艱若汝予嘉

顧祖謂晉侯之祖唐叔肇始也言晉能法文武自義和始也會者合其離也紹者繼其絕也辟君也乃辟平王自謂也追孝猶繼美也文人卽文王詩云告于文人文王爲西伯服事殷也脩扞脩飭扞衛也若汝予嘉如汝之功我所美也

王曰父義和其歸視爾師寧爾邦用賚爾秬鬯一卣彤弓一彤矢百盧弓一盧矢百馬四匹父往哉柔遠能邇惠康小民無荒寧簡恤爾都用成爾顯德

師衆也賚秬鬯使祭告其先也彤赤色盧黑色簡用

賢也。恤愛民也。按諸侯有武功則王錫弓矢以表之。詩誅彤弓。書命文侯。皆未有使專征伐之語。後儒因西伯戡黎伐崇密齊桓晉文爲侯伯。摟諸侯相伐遂臆度爲古禮。子云天下有道禮樂征伐自天子出。此不易之典。豈有治世而諸侯擅征伐者乎。或疑錄文侯之命以重晉也。夫晉莫盛于重耳之世。重耳納襄王亦受桓鬯弓矢爲侯伯。亦有冊命而不錄。故知錄文侯之命者傷平王之無父志。周所以亡。春秋繼此而作也。



費秘誓

此魯公伯禽將伐徐戎治兵于費而誓師之辭成王初年周公留相王室伯禽就魯封詩云乃命魯公俾侯于東是時武庚倡亂淮徐屢畔周公連年東征寇近魯郊故魯公出師敵王愾也在平時諸侯無征伐而說者遂謂魯公爲方伯其壽張附會類此然諸侯之事以終書何也亦猶詩之有魯頌也天子降而思康侯周亡而思魯魯周公之國文武亡而思周公故春秋因魯史以憲章文武忠臣孝子之情也魯丑三桓專而公室卑成襄以後五六公有奮然振作如伯

禽者則魯猶可爲而周公不褻夫子所以錄費誓也  
公曰嗟人無譁聽命徂茲淮夷徐戎並興善敎聊乃甲  
冑敵橋乃干無敢不弔的備乃弓矢鍛乃戈矛礪乃鋒  
刃無敢不善今惟淫舍牯牛馬牡乃獲畫斂聶乃穽無  
敢傷牯牯之傷汝則有常刑馬牛其風臣妾逋逃勿敢  
越逐祇復之我商賚汝乃越逐不復汝則有常刑無敢  
寇攘踰垣牆竊馬牛誘臣妾汝則有常刑甲戌我惟征  
徐戎峙乃糗糧無敢不逮汝則有大刑魯人三郊三遂  
峙乃楨榦甲戌我惟築無敢不供汝則有無餘刑非殺  
魯人三郊三遂峙乃芻初茭交無敢不多汝則有大刑

謹誼閑也。敝縫補也。古者甲冑皆用革。敵繫持也。干楮也。所以禦矢石。弔精至也。鍛煉也。礪磨也。淫舍縱放也。謂牧放牛馬于野也。牯犝習而械繫之也。如易大畜童牛之牯。備戰而教習牛馬于野。加羈勒。習索之類。獲機檻。陷阱。皆以掩捕禽獸者。杜絕之。斂塞之。以便馳驟。勿傷所牯之牛馬也。常刑當得之。刑馬牛。逸曰風。男僕曰臣。女婢曰妾。凡有臣妾牛馬亡失。勿越遠追逐。收者敬還之。商賚商量其多寡。賞賚還者也。越逐則輕進失伍。不復則攘奪相爭。寇至清野。固壘安靜。不擾則敵不知所攻。人心一紀律齊戰則

勝矣甲戌出師之日呼魯人者對敵命本國人之辭  
國外曰郊郊外曰遂言三者敵在一面則三面之人  
各具楨榦往築城壘防護也楨牆端當土之木榦兩  
旁夾版之木是日征卽是日築且戰且築也無餘刑  
非殺謂凡有不供築者雖人多不勝殺必皆刑之無  
遺也芻青芻茭乾芻軍需尤急比不供築者罪尤重  
也大刑重治也按伯禽以新造之國綜理練達周密  
如此讀其辭勃勃英氣信哉周公之子昭定之季安  
得有君如此者乎

# 秦誓

秦繆公不用蹇叔之言。誤聽杞子。越晉襲鄭。師無功。還。晉人邀擊。敗之于殽。此其悔過自誓之辭。而繫之末簡。何也。秦地。西周之地。秦民。西周之民。終秦。所以不忘周也。魯守周公之訓。好禮而過于柔。秦據文武之基。好戰而寡于禮。周既東矣。使魯能自立。則周公不衰。使秦能脩岐豐之舊。天下其秦乎。觀于書而知聖人之先見也。故魯獨後諸侯亡。秦先諸侯興。千餘年後事。若合符。豈非知幾其神者與。或者謂繆公賢。故聖人錄其辭。按繆公三敗不知止。用孟明竟罔功。

生受學于著人死殺其三良謚曰繆故其卒也春秋  
不書特以是篇有悔過之言取以終書終則窮窮則  
悔悔則新故易剝終則復復遠則迷一念迷悟而天  
下國家子孫黎民治亂係之故悔者窮之通也剝之  
上九碩果不食所以成言乎艮窮上反下爲萬事萬  
物之終始子云吾未見能見其過而內自訟者故不  
以人廢言也

公曰嗟我士聽無譁予誓告汝羣言之首古人有言曰  
民訖自若是多盤責人斯無難惟受責俾如流是惟艱  
哉我心之憂日月逾邁若弗云來惟古之謀人則曰未

就予思惟今之謀人姑將以爲親雖則云然尚猶詢茲  
黃髮則罔所愆番番波良士旅力旣愆我尚有之伉伉  
勇夫射御不違我尚不欲惟截截善諱擬言俾君子易  
辭我皇多有之昧昧我思之如有一介臣斷斷短猗無  
他伎其心休休焉其如有容人之有技若已有之人之  
彥聖其心好之不啻如自其口出是能容之以保我子  
孫黎民亦職有利哉人之有技冒疾以惡之人之彥聖  
而違之俾不違是不能容以不能保我子孫黎民亦曰  
殆哉邦之杌隍孽曰由一人邦之榮懷亦尚一人之慶  
羣言之首言之最要者也訖及也言恆情于已有過

若是其多方周旋責人之過斯易而不難惟受人之責者改過不吝如水之流是所難也引此以發自悔之端古之謀人老成練達之人不能遷就我之所諱忌今之謀人新進躁妄之士姑息將順以爲親信也雖則云然謂已往不可追也黃髮老人卽所謂古之謀人番番老貌旅力猶膂力言賢人不足于勇也伋伋勇貌射御不違言勇夫多材也截截利口也諛猶辯也以是爲非使君子易辭也皇猶尚也昧昧猶耿耿詩云不出于耿卽昧昧意介獨也一介猶一个斷斷無能貌猗語辭與兮通無他技無他才能也休休



之和也。彥美士聖通明也。不啻如自其口出言心之所好不但如口所言也。職主也。冒壅蔽也。疾妒也。違阻也。殆危也。杌隉不安也。榮光也。懷安也。榮則不辱安則不危。一人言榮辱安危惟在所任之一人不可不慎也。

尚書辨解卷八周書終

尚書辨解卷九

孔氏古文尚書篇目

孔安國序

尚書序

虞書

舜典

分堯典後半堯之文具前不復載篇首增六語之十八字載後

大禹謨

益稷

分皋陶謨後半堯之文具前不復載

夏書

五子之歌

胤征

商書

仲虺之誥

湯誥

伊訓

太甲上

太甲中

太甲下

咸有一德

盤庚上

盤庚本一篇今分爲三文具前不復

載

盤庚中

盤庚下

說命上

說命中

說命下

以上第九卷

周書

泰誓上

泰誓中

泰誓下

武成

旅獒

微子之命

仰之命

周官

君陳

康王之誥

分顧命後半克文具前不復

載

畢命

君牙

罔命

以上第十卷

右目皆伏生本所無破裂不合者餘目見前茲不再列

孔氏古文尚書

孔氏尚書漢未之有也東晉時豫章內史梅賾得之獻上比伏生本多二十五篇漢孔安國爲傳并安國自序一篇古書序一篇共五十八篇皆古科斗文字故世稱古文尚書云漢劉向班固賈逵馬融鄭玄輩皆未及見其始末悠謬故難盡信

孔安國自序

按序不類西漢語西漢文字朴直此姚鼐有六朝風氣後人擬作也

古者伏羲氏之王天下也始畫八卦造書契以代結繩

之政由是文籍生焉。伏犧神農黃帝之書謂之三墳。言大道也。少昊顓頊高辛唐虞之書謂之五典。言常道也。至于夏商周之書雖設教不倫。雅誥與義其歸一揆。是故歷代寶之以爲大訓。八卦之說謂之八索。求其義也。九州之志謂之九丘。丘聚也。言九州所有土地所生風氣所宜皆聚此書也。春秋左氏傳曰。楚左史倚相能讀三墳五典八索九丘。卽謂上世帝王遺書也。

漢之望古渺矣。甚于今之望漢也。漢文帝時去孔子垂五百年。中間歷七國秦項之亂。六籍存者蓋寡。而孔子去文武所又六百年。中間歷幽厲平王東遷五

霸十二諸侯之亂。文武周公制作存者亦寡。況復進而上之漸遠。漸稀。古竹簡記事難蓄。易敗。夫子已不能多得于古。而況漢以下乎。四代之書。伏生所傳。二十五篇。已爲天幸。過此更侈。譚三皇五帝風聞耳食。恍惚烏有。愈不足信矣。左傳一書。非丘明作了。然而引以爲徵。同于道聽塗說耳。

先君孔子生於周末。覩史籍之煩文。懼覽之者不一。遂乃定禮樂。明舊章。刪詩爲三百篇。約史記而脩春秋。讚易道以黜八索。述職方以除九丘。討論墳典。斷自唐虞。以下訖于周。芟夷煩亂。翦截浮辭。舉其宏綱。撮其機要。

足以垂世立教典謨訓誥誓命之文凡百篇所以恢弘至道示人主以軌範也帝王之制坦然明白可舉而行三千之徒并受其義

嗟夫吾夫子其亦不得見古列聖之書已矣夫子而得見神農黃帝少昊顓頊高辛五六聖人之書一切翦棄不傳雖我後生有餘憾焉豈五六聖人言無一足存記乎必不然矣周末距羲皇所不知幾千年計上古文字點畫形象尚未備而焉有所謂三墳五典八索九丘簡札之浩繁者乎有之亦後人僞撰如今世所傳三墳八索皆淺俗無稽周禮職方亦非聖人



手筆大抵六籍自尚書二十五篇周易春秋毛詩外  
多後儒補緝雖不盡詭于經而要非古之完璧也明  
者辨之

及秦始皇滅先代典籍焚書坑儒學士逃難解散我先  
人用藏其家書于屋壁漢室龍興開設學校旁求儒雅  
以闡大猷濟南伏生年過九十失其本經口以傳授裁  
二十餘篇以其上古之書謂之尚書百篇之義世莫得  
聞

百篇之說無所考祇據序爲言而序非古也按序周  
書三十九篇商書亦三十九篇夏書止四篇虞書多

至十五篇。夫子憲章文武師周公。讚易刪詩。脩春秋。正禮樂。皆取諸昭代。詩錄商頌。不過末簡。寂寥數篇。故曰。吾從周二代之禮。能言無徵。不應刪定。憲章新故。并存無別也。況費誓秦誓。又諸侯事。則文武制作。反少于先代。安在文獻不足。而吾周之從也。殷書既多。則夏不宜特少。夏少。則虞又不應過多。夏十七王。四百六十年間事。纔得書四篇。而虞以一帝六十年間事。上越千五百年。得書十五篇。然則虞舜文辭多。于周公也。豈其然乎。竊意夫子所刪書。亦應不多。伏生九十老儒。守一經。未遂遺忘過半。晁錯通敏儒臣。

奉詔踵門卒業。定非草草。故授受精確。無如此二十  
八篇。其編次井然。帝王升降之跡。皆備。增入孔書反  
覺龐雜。其辭塊扎。浩渺。非秦漢以後雕鑿清淺之文。  
誠哉。上世完璞。異代鴻寶。淺俗未易拔識也。取安國  
古文較之。蒼素了然。

至魯共王好治宮室。壞孔子舊宅。以廣其居。於壁中得  
先人所藏古文。虞夏商周之書。及傳論語孝經。皆科斗  
文字。王又升孔子堂。聞金石絲竹之音。乃不壞宅。悉以  
書還孔氏。科斗書廢已久。時人無能知者。以所聞伏生  
之書。考論文義。定其可知者。爲隸古定。更以竹簡寫之。

增多伏生二十五篇。伏生又以舜典合於堯典，益稷合於皋陶謨，盤庚三篇合爲一篇，康王之誥合於顧命。復出此篇并序，凡五十九篇，爲四十六卷。其餘錯亂磨滅，弗可復知。悉上送官，藏之書府，以待能者。

此假託之說也。漢惠帝時，魯共王壞孔子宅，得古文書上獻。班固劉歆亦嘗言之。第云安國獻書，未言詔安國爲傳也。云多伏生十六篇，無二十五篇。云遭巫蠱事，未列學官，未言傳畢不以聞也。其所謂十六篇者，在今二十五篇中，否不可考。但哀帝朝，劉歆請置博士，廷議不可。大臣龔勝以去就爭，師丹劾歆改亂。

舊章則當時已疑之是用湮沒不傳好事者因緣僞  
增至二十五篇託安國爲傳甚不足信也大抵漢初  
獻書不言發自塚中則云出自壁間實多後人補撰  
如論語二十篇傳神之筆亦其門人記錄他如周  
禮戴記儀禮左傳爾雅等書皆春秋戰國以來諸子  
雜著非盡出聖人手昔文勝莫如周秦之季六經散  
亡遭百氏侵牟千竇萬岐不可究詰孟子所謂處士  
橫議楊朱墨翟之言盈天下秦政非款啟之夫也李  
斯明習舊章吹洗深刻故自難欺計當世所焚坑非  
必盡先王之典學古之士也有如鄒衍公孫龍蘇秦

張儀之徒縱橫揣摩堅白同異之書亦自詭典刑雖  
二帝三王有不焚滅之者乎夫日月不毀而燐火易  
熄秦雖焚書而六籍至今在若夫放散淆亂百氏分  
任非獨秦矣炎漢初興購求頗濫真贗混收如孔書  
二十五篇自是春秋戰國以來陶冶之文三復成誦  
一覽可知伏生能記深奧大篇獨忘此明白短章無  
是理也如二十八篇文字高古真堪科斗二十五篇  
尋常豈爲科斗增重旣謂以今文定義義定文亦宜  
存以傳信不朽今義在而文不傳則并其所謂科斗  
者愚亦未敢信其爲實有也

詔爲五十九篇作傳於是遂研精覃思博考經籍採  
摭羣言以立訓傳約文申義敷暢厥旨庶幾有補于將  
來書序序所以爲作者之意昭然義見宜相附近故引  
之各冠其篇首定五十八篇旣畢會國有巫蠱事經籍  
道息用不復以聞傳之子孫以貽後代若好古博雅君  
子與我同志亦所不隱也

安國旣承詔作傳豈有不報命之理巫蠱事非久旋  
定武帝方注嚮儒術表章六經未爲道息有詔必不  
致廢閣豈使已成之業抑而不揚終兩漢三國魏晉  
數百年直待東晉後出容非妄與

孔氏古文尚書序

此孔書所傳尚書古序。漢劉歆班固亦云孔子序書則古文未出先有此序矣。今察其辭義疎畧而割裂舊章湊百篇之數。尤爲鄙拙。蔡仲默註書紕之是也。愚按六經易書詩皆有序。惟書序僞而朱元晦并詩序亦疑其僞。詩序本真而班孟堅劉子駿并書序亦以爲真。易序卦非聖人不能作。朱元晦反疑其僞。皆無卓然一定之見。夫序者直也。作者有未明之志。序以直之。易無序卦。則不知演易之意。詩無古序。則不知美刺之由。皆篇中所未傳。懼來者之無稽。故著爲



序所以不可廢也。如書序，祇依篇中文義重複演說，不用固無傷此真贋之分也。

昔在帝堯，聰明文思，光宅天下，將遜于位，讓于虞舜，作堯典。○虞舜側微，堯聞之，聰明將使之嗣位，歷試諸難，作舜典。

按伏書堯典一篇，並載舜事，書成于虞，故稱虞書。二聖際會，一德終始，故古史合典以別于革命之代。後人顧謂闕畧，割慎徽下爲舜典，非作者之意矣。然則舜禹又不同典，何也？曰舜攝堯，禹未嘗攝舜也。

帝釐下土方，設居方，別生分類，作汨作。○九共九篇，稟

飫

十一篇共爲一序九共九篇是一事作典九終四代書無此體豈唐虞之際多文乃爾邪且九篇何至偕亡稟飫亦篇名稟勞也飫賜也

臯陶矢厥謨禹成厥功帝舜申之作大禹臯陶謨益稷伏書無禹謨而臯陶謨包舉益稷本一篇今別補禹謨割臯陶謨補益稷猶分堯典之陋也篇內絕無益稷語奚以取名

禹別九州隨山濬川任土作貢○啓與有扈戰于甘之野作甘誓

二篇伏書孔書俱有

大康失邦昆弟五人須于洛汭作五子之歌

伏書無孔書有按五子作歌之由已具本篇何用複說若詩序自無此病

義和涸涇廢時亂日胤往征之作胤征

伏書無孔書有

自契至于成湯八遷湯始居亳從先王居作帝告齔沃○湯征諸侯葛伯不祀湯始征之作湯征○伊尹去亳適夏旣醜有夏復歸十亳入自北門乃遇汝鳩汝方作汝鳩汝方

五目無篇

伊尹相湯伐桀升自陟而遂與桀戰于鳴條之野作湯誓

伏書孔書俱有

湯既勝夏欲遷其社不可作夏社疑至臣扈○夏師敗績湯遂從之遂伐三朶宗俘厥寶玉誼伯仲伯作典寶

四目無篇

湯歸自夏至于大坰肩仲虺作誥

伏書無孔書有

湯既黜夏命復歸于亳作湯誥

伏書無孔書有司馬遷作史記載湯誥與孔書異其辭曰維三月王自至於東郊告諸侯羣后毋不有功于民勤力廼事予乃大罰殛汝毋予怨曰古禹臯陶久勞于外其有功乎民民乃有安東爲江比爲濟西爲河南爲淮四瀆已修萬民乃有居后稷降播農殖百穀三公咸有功于民故后有立昔蚩尤與其大夫作亂百姓帝乃弗予有狀先王言不可不勉曰不道毋之在國女毋我怨按漢伏生書無此篇司馬遷何從得此其辭義散漫無味而孔書湯誥又與此殊可知當世僞書甚多皆因序目杜撰不獨張霸武成孔

安國古文而已

名單善作明居

有目無篇

成湯既沒太甲元年伊尹作伊訓肆命徂后

按孟子云湯崩大丁未立外丙二年仲壬四年越六  
祀而後太甲嗣商制兄終弟及外丙仲壬皆大丁弟  
太甲大丁子繼仲壬司馬遷採世本作殷紀其說同  
今謂成湯既沒太甲元年中間隔六年缺二王與孟  
子史記不合序之不足信可知伊訓一篇伏書無孔  
書有肆命徂后二目無篇

太甲既立不明伊尹放諸桐三年復歸于亳思庸伊尹作太甲三篇○伊尹作成有一德

四篇伏書無孔書皆有

沃丁既葬伊尹于亳咎單遂訓伊尹事作沃丁○伊陟相大戊亳有祥桑穀共生于朝伊陟贊于巫咸作成又四篇○大戊贊于伊陟作伊陟原命○仲丁遷于囿期作仲丁○河亶甲居相作河亶甲○祖乙圮鞞上于耿作祖乙

十目無篇

盤庚五遷將治亳殷民咨胥怨作盤庚三篇

伏書孔書皆有。按殷始居商。成湯遷亳。仲丁遷囿。河  
亶甲遷相。祖乙遷耿。今復去耿。故篇中云。不常厥居。  
于今五邦。序附會經文。槩謂盤庚五遷。語欠分曉。蔡  
仲默所以譏其謬也。三篇一事故爲一篇。孔書割爲  
三。與太甲說命泰誓同湊百篇之數而已。

高宗夢得說。日使百工營求諸野。得諸傅巖。作說命三  
篇。

夢得良弼。記名畫象求之。果獲。事涉誕妄。抑當時高  
宗知說賢欲用。而神其事。與猶詩言。帝謂文王云爾。  
序乃作此孟浪語。伏書無孔書有。



高宗祭成湯有飛雉升鼎耳而雊祖已訓諸王作高  
宗彤融曰高宗之訓

按雉鳴鼎耳卽祭祀所用之雉始陳鼎廟門外牲未  
告殺之先偶有此故以爲異今云有飛雉則是野雉  
自外來也序僞而無識類此彤曰伏書孔書俱有高  
宗之訓有目無篇

殷始咎周周人乘黎祖伊恐奔告于受作西伯戡黎  
殷始咎周周人乘黎謂周伐黎以懼紂耳西伯必無  
此事伏書孔書俱有

殷旣錯

初去聲

天命微子作誥父師少師

伏書孔書俱有錯猶失也

惟十有一年武王伐殷一月戊午師渡孟津作泰誓三篇

此序謂武王十一年伐紂近是按洪範云十三年訪道于箕子可徵也說者惑于大戴云武王在位僅十年而此篇復有十三年春之文遂謂武王未嘗改元非也伏生本無此篇察其辭倨而俚後人僞撰也一月正月也戊午其日也

武王戎車三百兩虎賁奔三百人與受戰于牧野作牧

誓

伏書孔書俱有按孟子云虎賁三千人當以孟子爲據序嫌過多故變千爲百說詳本篇

武王伐殷往伐歸獸識其政事作武成

伏書無孔書有歸獸卽歸馬放牛然往伐歸獸不成語

武王勝殷殺受立武庚以箕子歸作洪範

伏書孔書俱有

武王旣勝殷邦諸侯班宗彝作分器

有目無篇邦諸侯不成語

西旅獻獒太保作旅獒

伏書無孔書有

巢伯來朝芮伯作旅巢命

有目無篇

武王有疾周公作金縢

金縢非周公自作如公作則小人心矣序于此等處孟浪之甚伏書孔書俱有

武王崩三監及淮夷叛周公相成王將黜殷作大誥

伏書孔書俱有

成王既黜殷命殺武庚命微子啓代殷後作微子之命  
伏書無孔書有

唐叔得禾異畝同穎獻諸天子王命唐叔歸周公于東作歸禾○周公既得命禾旅天子之命作嘉禾

二目無篇

成王既伐管叔蔡叔以殷餘民封康叔作康誥酒誥梓材

蔡仲默以誥辭似武王謂序不當稱成王非也康叔肇封雖自武王而升爲牧伯以司寇監殷則成王時也王幼周公述武王命命之伏書孔書俱有

成王在豐欲宅洛邑使召公先相宅作召誥○召公既相宅周公往營成周使來告卜作洛誥

二篇伏書孔書皆有其謂召詰爲成王作洛誥爲周公告卜自作皆非也

成周旣成遷殷頑民周公以王命告作多士

洛邑成而後遷殷士序說是也蔡仲默執以爲先遷殷民後營洛邑無據序妄謂殷士爲頑民而仲默又不非之諱見本篇伏書孔書皆有

周公作無逸○召公爲保周公爲師相成王爲左右召公不悅周公作君奭

二篇伏書孔書皆有召公不悅語不明起後人之疑蔡叔旣沒王命蔡仲踐諸侯位作蔡仲之命

伏書無孔書有篇中自有序此亦贅語

成王東伐淮夷遂踐奄作成王政○成王既踐奄將遷其君於蒲姑周公告召公作將蒲姑

二目無篇

成王歸自奄在宗周詰庶邦作多方○周公作立政

二篇伏書孔書俱有

成王既黜殷命滅淮夷還歸在豐作周官

伏書無孔書有篇中自有序此亦贅語

成王既伐東夷肅慎來賀王俾榮伯作肅慎之命○周公在豐將沒欲葬成周公薨成王葬于畢告周公作

姑

二目無篇

周公既沒命君陳分正東郊成周作君陳

伏書無孔書有

成王將崩命召公畢公率諸侯相康王作顧命○康王  
既尸天子遂誥諸侯作康王之誥

伏書通爲顧命一篇此割爲二尸天子語拙豈以諒  
陰爲尸居邪

康王命作冊畢分居里成周郊作畢命

伏書無孔書有作冊畢語不明



穆王命君牙爲周大司徒作君牙○穆王命伯冏爲周大僕正作冏命

二篇伏書無孔書有

呂命穆王訓夏贖刑作呂刑

伏書孔書皆有訓夏教諸夏也因篇中言三苗以肉刑爲夷狄之法云爾

平王錫晉文侯秬鬯圭瓚作文侯之命

伏書孔書俱有不序錫命之由但重數篇中物亦贅語也

魯侯伯禽宅曲阜徐夷並興東郊不開作費誓

伏書孔書俱有

秦繆公伐鄭晉襄公帥師敗諸崤又還歸作秦誓

伏書孔書俱有

以上通計目九十有八實存篇五十有八闕篇四十

孔氏古文虞書

郝敬解

舜典

曰若稽古帝舜曰重華協于帝。濬哲文明溫恭允塞玄德升聞乃命以位

舜典離堯典後半充之不具載堯典完璧焉可離也  
既離則慎微以下無緒另增此六語非堯典之舊也  
堯名放勳舜名重華故曰若稽古帝堯曰放勳蓋紀  
其號而繫之以名也此亦曰重華又曰協于帝則似  
以協帝釋重華也非名非事語不分曉詩云濬哲維

商又云。溫溫恭人。又云。王猷允塞。易云。天下文明。皆舊語。薈叢成文。豈如欽明文思安安。允恭克讓。自然高雅。

按司馬遷據堯典作本紀。亦無此六語。唐孔穎達正義云。梅賾上孔書時。舜典原無首二十八字。至齊蕭鸞建武四年。吳興姚方興得之于大航頭。然則來歷曖昧。本不足信。今但虛心玩誦。自覺技指如周易序卦。文王孔子所定。或于離者麗也下。增麗必有所感。故受之以咸。此類造端。從來多有。讀者不可好信而不知辨也。

# 大禹謨

古史簡要舜受堯終故虞書有堯典不復作舜典夏有禹貢不復作禹謨今別爲禹謨容非贅語乎其辭散漫不續而味復淺薄較臯謨猶懸解之于疏屬也曰若稽古大禹曰文命敷于四海祇承于帝曰后克艱厥后臣克艱厥臣政乃乂黎民敏德

禹名文命司馬遷本紀因之相傳舊矣今謂文命敷于四海非名非事語不分曉祇承于帝與敷于四海意不屬突引禹言后克艱厥后臣克艱厥臣等語與祇承于帝亦不甚屬黎民敏德與克艱意亦不甚屬

此後段段零碎。集句成文。前後氣脉都無管顧。

帝曰。俞允若茲。嘉言罔攸伏。野無遺賢。萬邦咸寧。稽于衆。舍已從人。不虐無告。不廢困窮。惟帝時克。

嘉言罔攸伏。野無遺賢。舍已從人。與上段意不屬。不虐無告。不廢困窮。與野無遺賢不屬。信口道來。語皆無著。

益曰。都。帝德廣運。乃聖乃神。乃武乃文。皇天眷命。奄有四海。爲天下君。

突發此贊。無謂。

禹曰。惠迪吉。從逆凶。惟影響。

前後血脉俱不相屬

益曰吁戒哉儆戒無虞罔失法度罔遊于逸罔淫于樂  
任賢勿貳去邪勿疑疑謀勿成百志惟熙罔違道以干  
百姓之譽罔拂百姓以從己之欲無怠無荒四夷來王  
語勢浮汎無著

禹曰於帝念哉德惟善政政在養民水火金木土穀惟  
脩正德利用厚生惟和九功惟敘九敘惟歌戒之用休  
董之用威勸之以九歌俾勿壞帝曰俞地平天成六府  
三事允治萬世永賴時乃功

德惟善政二語凡述水火金木土穀正德利用厚生

傳書 卷九  
爲九功。襲洪範五刑八政語。以九疇自禹出也。歌者  
勸民之辭。此段與上文亦不屬。欲起下文舜禪禹之  
事。綴入耳。

帝曰。格汝禹。朕宅帝位三十有三載。耄期倦于勤。汝  
惟不怠。總朕師。

九十曰耄。百年曰期。舜三十召用。相堯二十有八年。  
卽帝位三十有三年。是耄期之間也。按倦于勤。非聖  
人語。堯老舜攝。舜受堯終。以天下之大。與匹夫宰相  
行天子事。二十有八年。從古希有。故孔子贊堯蕩蕩  
則天。史臣以舜典從堯二聖一體。古今不容有兩。謂



禹復然是後人之附會耳。豈舜不若堯，禹不若舜乎？事不可常，雖聖人不相襲也。

禹曰：朕德罔克，民不依。皐陶邁種德，德乃降，黎民懷之。帝念哉！念茲在茲，釋茲在茲，名言茲在茲，允出茲在茲，惟帝念功。

邁種德，謂行布德也。此語近俚，降下及也。茲指皐陶。念，謂思其可用之人。釋，謂得人而此念釋也。名言，謂告之天下，允出，謂名副其實也。此四語，躁擾重複而無深味。蘇軾作存心解，然禹方讓功，則與上文禪位意不接。

帝曰臯陶惟茲臣庶罔或干予正汝作士明于五刑以弼五教期于予治刑期于無刑民協于中時乃功懋哉臯陶曰帝德罔愆臨下以簡御衆以寬罰弗及嗣賞延于世宥過無大刑故無小罪疑惟輕功疑惟重與其殺不辜寧失不經好生之德洽于民心茲用不犯于有司帝曰俾予從欲以治四方風動惟乃之休

帝德罔愆以下語特熟爽似秦漢以後文字

帝曰來禹澤水儆予成允成功惟汝賢克勤于邦克儉于家不自滿假惟汝賢汝惟不矜天下莫與汝爭能汝惟不伐天下莫與汝爭功予懋乃德嘉乃丕績天之曆

數在汝躬汝終陟元后

按堯讓舜曰格汝舜格訓來後人襲用訓詁語也然前言格汝禹此又言來禹言格則感召尊崇之意備言來則狎呼之矣成允成功謂信能成功也澤水傲予孟子引之天之歷數在汝躬允執其中四海困窮天祿永終論語載之陸續竄入上下文終非一律觀康誥篇大學引語自殊

人心惟危道心惟微惟精惟一允執厥中

先儒謂此十六字爲心學之要似也然自是三代以後語在禮記中庸大學孟子及南宋理學諸書則此

語爲名理。在古神聖面授。則爲贅言。古人卽事是道。別無有適可傳者。世至春秋已晚。孔子揚摧斯文。罕言仁。罕言命。性與天道不可得聞。惟是庸言庸行。五倫三德。入孝出弟。而道在矣。其告顏淵。惟曰克己復禮。語曾參。惟曰一以貫之。與賜言。卽不領畧。亦惟不領畧。故諸賢于道。竟有實地。聖人所以貴不言之教也。堯命舜曰。允執厥中。盡矣。與仲尼克復一貫先後同揆。此外更加分疏。便成枝指。中本無象。惟精惟一。以求厥中。亦是著象之語。大抵言語一途。惟宣布詔令。開譬事理。至于道德性命。一著言語。便生牆壁。故

易祗言象言數惟佛老譚空說玄愈微愈荒是以聖人嘿識無隱不言而述無知而知兩端自竭故曰知我其天況舜禹覲面相授有是嘏嘏者與其辭甚深刻而其旨反淺狹酷似後儒理學家言愚以言而辨其僞非以言不善而詆其僞也

無稽之言勿聽弗詢之謀勿庸可愛非君可畏非民衆非元后何戴后非衆罔與守邦欽哉慎乃有位敬脩其可願四海困窮天祿永終惟口出好興戎朕言不再辭多而脉散可愛非君等皆後世語朕言不再先之以惟口出好興戎無謂

禹曰。枚卜功臣。惟吉之從。帝曰。禹。官占惟先。蔽志。昆命于元龜。朕志先定。詢謀僉同。鬼神其依。龜策協從。卜不習吉。禹拜稽首。固辭。帝曰。毋。惟汝諧。正月朔旦。受命于神宗。率百官。若帝之初。

枚卜。歷卜也。官卜。筮之官。蔽志。斷于心也。昆。衆也。僉。皆也。習。重也。卜筮之法。不待重吉也。或謂禹謨。非古則受禪之事。缺矣。夫禹貢九州攸同。以下禹有天下之事。備錫玄圭。告成功。容非禪受乎。五臣相舜。臯謨備矣。禹謨益稷。不誠懸疣乎哉。

帝曰。咨。禹。惟時有苗弗率。汝徂征。禹乃會羣后。誓于師。

曰濟濟有衆咸聽朕命蠢茲有苗昏迷不恭侮慢自賢  
反道敗德君子在野小人在位民棄不保天降之咎肆  
予以爾衆士奉辭伐罪爾尚一乃心力其克有勲三旬  
苗民逆命益贊于禹曰惟德動天無遠弗届滿招損謙  
受益時乃天道帝初于歷山往于田日號泣于旻天父  
母負罪引慝祇載見瞽瞍夔夔齊慄瞽亦允若至誠感  
神矧茲有苗禹拜昌言曰兪班師振旅帝乃誕敷文德  
舞干羽于兩階七旬有苗格

此段因虞書舜分北有苗緣飾其辭耳苟不量其可  
而徂征則始行爲輕舉舞干羽七旬而苗服則功成

爲幻化此後世伐原攻鼓之熟套不可誣先聖堯舜  
禹積德百有餘年世躋雍熙三苗之格不在兩階七  
旬之舞也古史記事聖人刪書典要可行必無迂語  
損益天道因襲周易謙卦彖傳之意歷山往田日號  
泣于旻天于父母祇載見瞽瞍夔夔齊慄瞽瞍亦允  
若孟子引語牽補殊乏自然謂帝父母難格甚于苗  
民尤不倫繇猶瞽瞍也仁人孝子遭遇偶同豈爲此  
言大抵讀禹謨如搏砂若臯謨盛水不漏真屬懸殊  
矣

益稷



本臯陶謨分帝曰來禹以下充數而篇中絕無益稷  
語所謂范冠而蟬綾無謂也文具前不詳載

孔氏古文夏書

五子之歌

太康尸位以逸豫滅厥德黎民咸貳乃盤遊無度畋于  
有洛之表十旬弗反有窮后羿因民弗忍距于河厥弟  
五人御其母以從漢上于洛之汭五子咸怨述大禹  
之戒以作歌其一曰皇祖有訓民可近不可下民惟邦  
本本固邦寧予視天下愚夫愚婦一能勝予一人三失  
怨豈在明不見是圖予臨兆民凜乎若朽索之馭六馬  
爲人上者奈何不敬其二曰訓有之內作色荒外作禽  
荒甘酒嗜音峻宇彫牆有一于此未或不亡其三曰惟

彼陶唐有此冀方。今失厥道，亂其紀綱，乃底滅亡。其四曰：明明我祖，萬邦之君，有典有則，貽厥子孫。關石和鈞，王府則有。荒隆厥緒，覆宗絕祀。其五曰：嗚呼曷歸，予懷之悲。萬姓仇予，予將疇依。鬱陶乎予心，顏厚有忸怩。弗慎厥德，雖悔可追。

五歌伯仲漢魏，其典則敦厚，不及十二國風而欲陵商周雅頌上之意，淺響浮，其弗及矣。五子輒爲五歌，豈一人當一歌邪？又似爲題所誤矣。冀方冀州，帝都也。關通也。石鈞皆量名，三十斤爲鈞。四鈞爲石。關和平準意。

胤征

惟仲康肇位四海胤侯命掌六師羲和廢厥職酒荒于厥邑胤后承王命徂征告于衆曰嗟予有衆聖有謨訓明徵定保先王克謹天戒臣人克有常憲百官脩輔厥后惟明明每歲孟春適人以木鐸徇于路官司相規工執藝事以諫其或不恭邦有常刑惟時羲和顛覆厥德沈亂于酒畔官離次俶擾天紀遐棄厥司乃季秋月朔辰弗集于房瞽奏鼓嗇夫馳庶人走羲和尸厥官罔聞知昏迷于天象以干先王之誅政典曰先時者殺無赦不及時者殺無赦今予以爾有衆奉將天罰爾衆士同

力王室尚弼予欽承天子威命火炎崑岡玉石俱焚天吏逸德烈于猛火殲厥渠魁脅從罔治舊染汙俗咸與惟新嗚呼威克厥愛允濟愛克厥威允罔功其爾衆士懋戒哉

羲和日官適人聚衆宣令之官適聚也倣始也擾亂也言日官首亂法也辰日月所會之次房當房星之辰集輯通和也日月相薄蝕故曰不和嗇夫郊野傳命之官馳走告變也

按此辭羲和所犯一獄吏之力耳何足以勤王師當時卽有胤征其必有他故仲康承大康之亂有窮竊

命不討逐君之賊而征曠職之官乎。未幾少康中興  
豈無一辭足錄而奚取于胤征。其浮藻類左國無忠  
代朴直之味。孟春道人以木鐸徇路。官師工瞽嗇夫  
庶人皆周禮月令之意。援引政典先王未必有此刑  
玉石俱焚。天吏猛火似後世露布檄文。玉石俱焚非  
王者之師。烈于猛火非天吏之德。所以誅其首惡宥  
其脅從。此爲周旋解釋而語終覺有疵。末云威克愛  
允濟愛克威罔功。又似尚猛矣。豈有不能愛而能威  
者乎。

孔氏古文商書

仲虺之誥

成湯放桀于南巢。惟有慙德。曰。予恐來世以台。怡爲口實。

此因湯誓非台小子敢行稱亂之語而緣飾爲慙德也。夫聖人奉天伐暴。何慙之有。心慙而強爲之。非聖人行事。有慙而倩人言自解。非聖人存心。

仲虺乃作誥曰。嗚呼。惟天生民有欲。無主乃亂。此等語意。發自論孟以後。

惟天生聰明時。又有夏昏德。民墜塗炭。天乃錫王勇智。

表正萬邦。纘禹舊服。茲率厥典。奉若天命。夏王有罪。矯誣上天。以布命于下。帝用不臧。式商受命。用爽厥師。簡賢附勢。寔繁有徒。肇我邦于有夏。若苗之有莠。若粟之有秕。小大戰戰。罔不懼于非辜。矧予之德言足聽聞。惟王不邇聲色。不殖貨利。德懋懋官。功懋懋賞。用人惟已。改過不吝。克寬克仁。彰信兆民。

爽厥師言明于人情也。師衆也。簡賢附勢。謂小人在位也。實繁有徒。言衆多也。苗有莠。粟有秕。言不相容也。蓋指夏臺之難用人。惟已視人之能。猶已出也。乃葛伯仇餉。初征自葛。東征西夷怨。南征北狄怨。曰奚



獨後予攸祖之民室家相慶曰。後予后。后來其蘇。民之戴商厥惟舊哉。

此一段本孟子引古書。小變其辭。牽綴在此。而古語自別。突入此段。上下文勢梗塞。

佑賢輔德。顯忠遂良。兼弱攻昧。取亂侮亡。推亡固存。邦乃其昌。

語近俳偶。四代之文。少有此體。

德日新。萬邦惟懷。志自滿。九族乃離。王懋昭大德。建中于民。以義制事。以禮制心。垂裕後昆。予聞曰。能自得師者。王。謂人莫已若者。亡。好問則裕。自用則小。嗚呼。慎厥

終惟其始殖有禮覆昏暴欽崇天道永保天命  
都無釋慙意通篇集句成文自五子之歌以下二代  
書都似一律辭雖佳要之非古

湯誥

按司馬遷作殷本紀別載湯誥與此辭異詳見序彼  
辭散而淡此辭麗而婉然皆非古也

王歸自克夏至于亳誕告萬方王曰嗟爾萬方有衆明  
聽予一人誥惟皇上帝降衷于下民若有恆性克綏厥  
猷惟后

惟皇數語自然民詩創始孟子拈出

夏王滅德作威。以敷虐于爾萬方。百姓。爾萬方百姓。罹其凶害。弗忍荼徒毒。並告無辜于上下神祇。天道福善。禍淫。降災于夏。以彰厥罪。肆台小子。將天命明威。不敢赦。敢用玄牡。敢昭告于上天神后。請罪有夏。聿求元聖。與之戮力。以與爾有衆。請命上天。孚佑下民。罪人黜伏。天命弗僭。賁賁若草木。兆民允殖。俾予一人輯寧爾邦。家。茲朕未知。獲戾于上下。慄慄危懼。若將隕允于深淵。凡我造邦。無從匪彝。無卽慝切淫。各守爾典。以承天休。爾有善朕。弗敢蔽罪。當朕躬。弗敢自赦。惟簡在上帝之心。其爾萬方有罪。在予一人。予一人有罪。無以爾萬方。

鳴呼尚克時忱乃亦有終

依論語所載湯辭敷衍補綴然不如論語簡質讀湯誓自知二誥淺泛

伊訓

惟元祀十有二月乙丑伊尹祠于先王奉嗣王祗見厥祖侯甸羣后咸在百官總已以聽冢宰伊尹乃言烈祖之成德以訓于王

後世敘事語法

曰嗚呼古有夏先后方懋厥德罔有天災山川鬼神亦莫不寧暨鳥獸魚鼈咸若于其子孫弗率皇天降災假

手于我有命造攻自鳴條朕哉自亳

孟子引伊訓云天誅造攻自牧宮朕哉自亳此等語  
意渾含是古人口澤假手于我則薄俗語矣凡孔書  
所載傳記引語皆牽強填補痕迹宛然按孟子云舜  
卒于鳴條堯典云舜陟方乃死史本紀亦云舜南巡  
守卒于蒼梧之野然則鳴條其卽蒼梧邪孔註云鳴  
條在安邑今山西平陽府安邑縣亦據孔書耳未知  
是否孟子作牧宮爲正

惟我商王布昭聖武代虐以寬兆民允懷今王嗣厥德  
罔不在初立愛惟親立敬惟長始于家邦終于四海鳴

呼先王。肇脩人紀。從諫弗咈。先民時若。居上克明。爲下克忠。與人不求備。檢身若不及。以至于有萬邦。茲惟艱哉。敷求哲人。俾輔于爾後嗣。制官刑。儆于有位。曰。敢有恆舞于宮。酣歌于室。時謂巫風。敢有殉于貨色。恆于遊畋。時謂淫風。敢有侮聖言。逆忠直。遠耆德。比頑童。時謂亂風。惟茲三風十愆。卿士有一于身。家必喪。邦君有一于身。國必亡。臣下不匡。其刑墨。具訓于蒙士。嗚呼。嗣王祗厥身。念哉。聖謨。泮泮。嘉言孔彰。惟上帝不常。作善降之百祥。作不善降之百殃。爾惟德罔小。萬邦惟慶。爾惟不德。罔大隆厥宗。

按伏書諸誥反覆開喻動數十更端未已意滿胸臆  
咄咄如不啻口出于結澗中見古人天真若二十五  
篇文彩歷錄音韻鏗鏘徑情直發一往便終祇似後  
世箴頌教令語雖正而響盡意竭無復黯然之思左  
國下至漢魏不乏佳篇何必三代也三風十愆睚眦  
盛氣亦不似聖人語意

### 太甲上

惟嗣王不惠于阿衡伊尹作書曰先王顧謏天之明命  
以承上下神祇社稷宗廟罔不祇肅天監厥德用集大  
命撫綏萬方惟尹躬克左右厥辟宅師肆嗣王丕承基

尚書卷之九 卷九  
緒惟尹躬先見于西邑夏自周有終相亦惟終其後嗣  
王罔克有終相亦罔終嗣王戒哉祗爾厥辟辟壁不辟  
忝厥祖王惟庸罔念聞伊尹乃言曰先王昧爽不顯坐  
以待旦旁求俊彥啓迪後人無越厥命以自覆慎乃儉  
德惟懷永圖若虞機張往省括于度則釋欽厥止率乃  
祖攸行惟朕以懌萬世有辭王未克變伊尹曰茲乃不  
義習與性成予弗狎于弗順營于桐宮密邇先王其訓  
無俾世迷王徂桐宮居憂克終永德

謏與是同忠信曰周昧爽天初明也虞虞人也機弩  
牙也括矢銜弦處此章語亦浮汎所以告戒嗣王者



甚徐何至見放禮記大學引顧諟一語章首綴入增  
先王二字緇衣引惟尹躬先見三語坊記引辟不辟  
二語緇衣引無越厥命及若虞機張三語皆真古書  
前後卽不類故知多後人補緝也

### 太甲中

惟三祀十有二月朔伊尹以冕服奉嗣王歸于亳作書  
曰民非后罔克胥匡以生后非民罔以辟璧四方皇天  
眷佑有商俾嗣王克終厥德寶萬世無疆之休王拜手  
稽首曰予小子不明于德自底不類欲敗度縱敗禮以  
速戾于厥躬天作孽猶可違自作孽不可逭換旣往背

師保之訓弗克于厥初尚賴匡救之德圖惟厥終伊尹  
拜手稽首曰脩厥身允德協于下惟明后先王子惠困  
窮民服厥命罔有不悅並其有邦厥鄰乃曰徯我后后  
來無罰王懋乃德視乃烈祖無時豫怠奉先思孝接下  
思恭視遠惟明聽德惟聰朕承王之休無斁

孟子引天作孽四語真伊尹訓辭今若爲太甲語是  
以被放爲孽以歸亳爲追辭旨淺陋

### 太甲下

伊尹申誥于王曰嗚呼惟天無親克敬惟親民罔常懷  
懷于有仁鬼神無常享享于克誠天位艱哉德惟治否

德亂與治同道罔不興與亂同事罔不亡終始慎厥與  
惟明明后先王惟時懋敬厥德克配上帝今王嗣有令  
緒尚監茲哉若升高必自下若陟遐必自邇無輕民事  
惟難無安厥位惟危慎終于始有言逆于汝心必求諸  
道有言遜于汝志必求諸非道嗚呼弗慮胡獲弗爲胡  
成一人元良萬邦以貞君罔以辯言亂舊政臣罔以寵  
利居成功邦其永孚于休

以上三篇無一語切當時事情任教何王皆可焉知  
爲伊尹訓太甲

咸有一德

伊尹旣復政厥辟將告歸乃陳戒于德曰嗚呼天難謀  
命靡常常厥德保厥位厥德靡常九有以亡夏王弗克  
庸德慢神虐民皇天弗保監于萬方啓迪有命眷求一  
德俾作神主惟尹躬暨湯咸有一德克享天心受天明  
命以有九有之師爰革夏正非天私我有商惟天佑于  
一德非商求于下民惟民歸于一德德惟一動罔不吉  
德二三動罔不凶惟吉凶不僭在人惟天降災祥在德  
今嗣王新服厥命惟新厥德終始惟一時乃日新任官  
惟賢材左右惟其人臣爲上爲德爲下爲民其難其慎  
惟和惟一德無常師主善爲師善無常主協于克一俾

萬姓咸曰大哉王言又曰一哉王心克綏先王之祿  
底烝民之生嗚呼七世之廟可以觀德萬夫之長可以  
觀政后非民罔使民非后罔事無自廣以狹人匹夫匹  
婦不獲自盡民主罔與成厥功

伊訓以下五篇辭皆淺泛無古人塊北沈冥之意列  
之禹謨湯誓盤庚間絕不類其非古書無疑也篇名  
咸有一德似是較數故曰咸有猶各擅一長云爾今  
所言皆純一意則伊尹不合自矜與湯咸有此一殆  
後人依題擬撰遶揀湊砌而乏天真

盤庚上

讀盤庚自知仲虺誥以下諸書爲屢作古今文辭丰  
神氣骨天壤懸隔何可相亂也此書本一篇今分爲  
三自首至罰及爾身弗可悔爲上篇具前申命雖有  
次第而遷亳本一事故併爲一篇如洛誥合數事爲  
一篇亦本營洛一事也

### 盤庚中

自盤庚作惟涉河至永建厥家爲中篇文具前

### 盤庚下

自盤庚旣遷至末爲下篇文具前

### 說命上

王宅憂亮陰三祀既免喪其惟弗言羣臣咸諫于王曰  
嗚呼知之曰明哲明哲實作則天子惟君萬邦百官承  
式王言惟作命不言臣下罔攸稟令王庸作書以誥曰  
以台正于四方台恐德弗類茲故弗言恭默思道夢帝  
賚予良弼其代予言

按論語子張問書云高宗亮陰三年不言本周書無  
逸語此節變化其意而講張不情亮明也陰暗也居  
喪之名猶言昧爽愁慘不分明之貌漢儒作梁庵爲  
倚廬鑿也亮陰卽是宅憂言宅憂又言亮陰因襲訓  
詁成誤耳三年不言謂居喪三年不親政不發號孔

子云百官總已以聽于冢宰之謂非箝口不發聲也  
今云既免喪不言羣臣強諫終不言但作書告自謂  
恭默思道夢帝賚良弼代言則迂誕甚矣

乃審厥象俾以形旁求于天下說曰築傅巖之野惟肖  
爰立作相王置諸其左右

夢由想生或有之謂圖夢中形象求得則妄矣惟夢  
之信不試其可而爰立作相豈明主用人之法與

命之曰朝夕納誨以輔台德若金用汝作礪若濟巨川  
用汝作舟楫若歲大旱用汝作霖雨啟乃心沃朕心若  
樂弗瞋眩厥疾弗瘳若跣弗視地厥足用傷惟暨乃



罔不同心以匡乃辟。俾率先王迪我高后。以康兆民。嗚呼。欽予時命。其惟有終。說復于王曰。惟木從繩則正。后從諫則聖。后克聖。臣不命其承。疇敢不祗。若王之休命。始至遽命作礪。作舟楫。作霖雨。甚造次又無一言切。帝賚事。何以別其爲命說也。若藥不瞑眩。二語古雅。孟子引之。若跣弗視地。二語卽不倫。

說命中

惟說命。總百官。乃進于王曰。嗚呼。明王奉若天道。建邦設都。樹后王君。公承以大夫師長。不惟逸豫。惟以亂民。惟天聰明。惟聖時憲。惟臣欽若。惟民從乂。惟口起羞。惟

甲冑起戎惟衣裳在笥惟干戈省厥躬王惟戒茲允茲克明乃罔不休

禹謨云惟口出好興戎此言口能起羞不獨甲冑能與戎也勿以衣裳爲安當以干戈自省

惟治亂在庶官官不及私昵惟其能爵罔及惡德惟其賢慮善以動動惟厥時有其善喪厥善矜其能喪厥功惟事事乃其有備有備無患無啓寵納侮無恥過作非惟厥攸居政事惟醇黷于祭祀時謂弗欽禮煩則亂事神則難王曰旨哉說乃言惟服乃不良于言予罔聞于行說拜稽首曰非知之艱行之惟艱王忱不艱允協于

先王成德惟說不言有厥咎

惟厥攸居卽安汝止意政事惟醇卽德惟一意王忱  
不艱謂王信行難卽不難矣

說命下

王曰來汝說台小子舊學于甘盤旣乃遯于荒野入宅  
于河自河徂亳暨厥終罔顯爾惟訓于朕志若作酒醴  
爾惟麴蘖若作和羹爾惟鹽梅爾交脩予罔予棄予惟  
克邁乃訓說曰王人求多聞時惟建事學于古訓乃有  
獲事不師古以克永世匪說攸聞惟學遜志務時敏厥  
脩乃來允懷于茲道積于厥躬惟敷學半念終始典于

學厥德脩罔覺監于先王成憲其永無愆惟說式克欽承旁招俊乂列于庶位王曰嗚呼說四海之內咸仰朕德時乃風股肱惟人良臣惟聖昔先正保衡作我先王乃曰予弗克俾厥后惟堯舜其心愧恥若撻于市一夫不獲則曰時予之辜佑我烈祖格于皇天爾尚明保予罔俾阿衡專美有商惟后非賢不乂惟賢非后不食其爾克紹乃辟于先王永綏民說拜稽首曰敢對揚天子之休命

遜志時敏厥修乃來卽論語時習而說意數教也半謂半由學半由教未可全倚師訓也罔俾阿衡專美

有商近代語意按說命伊訓太甲諸篇辭義俱可轉  
移通用古訓真切國史典要定不浮泛孔氏商書十  
篇都似一手耳

尚書辨解卷九終

尚書辨解卷十

孔氏古文周書

泰誓上

泰猶大也。武王伐紂。大告諸侯之辭。

惟十有三年春。大會于孟津。

按序云。十有一年。近是。此謂十有三年者。因洪範云。十有三年訪箕子。以爲武王訪箕子。卽釋箕子囚之日。其釋箕子囚。卽誅紂之日。而附會其說。非也。武王伐商。下車訪道。惟日不足。誠有之。而箕子宗國新喪。豈肯卽言。故史記云。武王克殷後二年。問箕子殷所。

以亡箕子不忍言而洪範亦曰王乃言非卽問也又曰箕子乃言非卽告也然則殷亡紂死非箕子陳洪範之年十三年作洪範十一年伐商近是孔子曰武王一戎衣而有天下未嘗言十一年觀兵十三年再舉也孔穎達疏義因武王末受命之說引大戴記文王十五生武王武王少文王十四歲而小戴記謂文王九十七終武王九十三終文王崩時武王已八十有三八十四卽位九十三崩在位僅十年故謂十一年十三年者皆承文王年數文王以虞芮質成之年受命改元九年崩武王立不復改元故終喪觀兵通

文王九年爲十一年。又二年伐紂。合之爲十三年。此說謬也。文王以臣節終。孔子稱爲至德。萬無受命改元之事。虞芮質成。亦何足爲受命之符。詩言文王蹶厥生。未嘗言改元。而武王嗣君新立。自古無不改元之禮。若謂武王承考。亟于卒事。不改元。則是文王以不亡商爲恨。而武王以亟得天下爲快也。豈二聖宅心行事。其言文武壽年或不謬。而武王卽位早晚。歷數多寡。實無所據。若謂文王十五生武王。先又生伯邑考。則文王以何年婚人。道謹始嘉禮。以時未必太早。若謂武王後文王止十年崩。則洪範所稱十三年。



與金縢云伐商後二年。豈皆謬邪。大抵漢唐諸儒說經。祇憑雜記風影牽合。今當以洪範十有三年爲正。而序說十一年伐商。近之序先出。或有所本耳。

王曰。嗟我友邦冢君。越我御事。庶士明聽誓。惟天地萬物父母。惟人萬物之靈。亶聰明作元后。元后作民父母。今商王受弗敬上天。降災下民。沈湎冒色。敢行暴虐。罪人以族。官人以世。惟宮室臺榭陂池侈服。以殘害于爾萬姓。焚炙忠良。剗剔孕婦。皇天震怒。命我文考。肅將天威。大勲未集。

三代以前。無夷族之刑。罪人以族。自秦始耳。命我文

考肅將天威附會末年受命改元之說文王無受命  
伐商之心矧有是事

肆予小子發以爾友邦冢君觀政于商

此因序十一年而附會爲觀政之說也

惟受罔有悛心乃夷居弗事上帝神祇遺厥先宗廟弗  
祀犧牲粢盛旣于凶盜乃曰吾有民有命罔懲其侮天  
佑下民作之君作之師惟其克相上帝寵綏四方有罪  
無罪予曷敢有越厥志

夷居平居也旣于凶盜卽箕子所謂殷民攘竊神祇  
之犧牲牲用以容也罔懲其侮不止其慢也天佑下

民七句。取孟子引書辭填補前後不屬。本謂命德討罪。天下不敢違。此爲武王自言。曷敢有越志語。意未順。

同力度德。同德度義。受有臣億萬。惟億萬心。予有臣三千。惟一心。

受有臣億萬。因襲大雅文王之詩云。商之孫子。其麗不億。詩蓋誦文王之功。甚言商人之衆耳。紂有三仁。不能保掃境內之衆。亦不能億萬有臣三千。因襲孟子虎賁三千之語。周家之衆。何止三千。都非實錄。

商罪貫盈。天命誅之。予弗順天。厥罪惟鈞。予小子夙夜。

祇懼受命文考類于上帝宜于冢土以爾有衆底天之  
罰天矜于民民之所欲天必從之爾尚弼予一人永清  
四海時哉弗可失

底致也天矜于民等語皆庸淺

泰誓中

惟戊午王次于河朔羣后以師畢會王乃徇師而誓曰  
嗚呼西土有衆咸聽朕言我聞吉人爲善惟日不足凶  
人爲不善亦惟日不足今商王受力行無度播棄黎老  
昵比罪人淫酗肆虐臣下化之朋家作仇脅權相滅無  
辜額天穢德彰聞惟天惠民惟辟奉天有夏桀弗克若

天流毒下國。天乃佑命成湯。降黜夏命。惟受罪浮于桀。剥喪元良。賊虐諛輔。謂已有天命。謂敬不足行。謂祭無益。謂暴無傷。厥鑒惟不遠在彼夏王。天其以予乂民。朕夢協朕卜。襲于休祚。戎商必克。受有億兆夷人。離心離德。予有亂臣十人。同心同德。雖有周親。不如仁人。天視自我民視。天聽自我民聽。百姓有過。在予一人。今朕必往我武。惟揚。侵于之疆。取彼凶殘。我伐用張。于湯有光。勛哉夫子。罔或無畏。寧執非敵。百姓凜凜。若崩厥角。嗚呼。乃一德一心。立定厥功。惟克永世。

古泰誓亡矣。此辭補綴雜亂無序。謂已有天命。及受

有億兆夷人等語皆庸淺孟子引泰誓云我  
侵于之疆則取于殘殺伐用張于湯有光王曰  
寧爾也非敵百姓也若崩厥角稽首此古書穗贊武  
王之辭牽補不合轉作武王戒飭軍士語云無或以  
紂爲不足畏寧執心以爲非我所敵百姓凜凜危懼  
與孟子引書意矛盾不應孟子反厲邪

### 泰誓下

時厥明王乃大巡六師明誓衆士王曰嗚呼我西土君  
子天有顯道厥類惟彰今商王受狎侮五常荒怠弗敬  
自絕于天結寃于民斲酌朝涉之脛剖賢人之心作威

尚書卷之四  
殺戮毒痛敷四海崇信姦回放黜師保屏棄典刑囚奴  
正士郊社不脩宗廟不享作奇技淫巧以悅婦人上帝  
弗順祝降時喪爾其孜孜奉予一人恭行天罰古人有  
言曰撫我則后虐我則讐獨夫受洪惟作威乃汝世讐  
樹德務滋除惡務本肆予小子誕以爾衆士殄殲乃讐  
爾衆士其尚迪果毅以登乃辟功多有厚賞不迪有顯  
戮嗚呼惟我文考若日月之照臨光于四方顯于西土  
惟我有周誕受多方予克受非予武惟朕文考無罪受  
克予非朕文考有罪惟予小子無良

斲斲同紂見冬月朝涉水者謂其脛耐寒斲而視之

賢人比干也。紂謂聖人心有七竅，剖而視之，二說多。後人因事附會，祝斷也，迪，勉行也。果毅斷以致勇，無猶豫也。登成也，顯戮戮示衆也。愚按聖人舉大事，當君臣之際，處萬不得已之時，勢天命已集，人心已會，興亡行止，間不容髮，何暇瑣瑣脩文瀆告多辭，紂惡誠可誅，民心誠欲亡，紂應天順民，取之而君臣之義自在，何必指摘宣揚，倨侮忿厲之甚。牧誓較湯誓激切矣。然先後詳畧，猶有體要近情。此三篇煩複瑣碎，不如牧誓簡正。牧誓猶稱王，而此直斥獨夫受畧，無顧忌，末引文王尤爲失類。文王不忍伐商，志表千古。



使文王欲王商亡豈待武王又使武王欲取商豈在  
十一年後文王可已故以臣節終武王不可已故末  
年受命亦非其本心而況以累文考乎作者誤于文  
王末年受命之說其無識不足怪而其厚誣聖人不  
可不辨也苟武王伐紂忿憤如秦誓誇誇如武成何  
以爲武王故論者有武王非聖人之疑又謂文王見  
辱故武王擒紂釋諒闇而卽戎載木主而示迷武王  
於紂有怨辭此皆起于誤信秦誓而不察其爲僞作  
耳

武成

舊說此篇記武王既伐紂成功之事孟子曰吾子  
成取二三策蓋古有是書亡而後人作之世偽武  
成不獨此一篇耳

惟一月壬辰旁死魄越翼日癸巳王朝步自周于征伐  
商厥四月哉生明王來自商至于豐乃偃武脩文歸馬  
于華山之陽放牛于桃林之野示天下弗服丁未祀于  
周廟邦甸侯衛駿奔走執豆蓬越三日庚戌柴望大告  
武成既生魄庶邦冢君暨百工受命于周王若曰嗚呼  
羣后惟先王建邦啓土公劉克篤前烈至于大王肇基  
王迹王季其勤王家我文考文王克成厥勲誕膺天命

以撫方夏大邦畏其力小邦懷其德惟九年大統未集  
月朔爲死魄二日爲旁死魄三日爲哉生明望後爲  
既生魄月爲陰陰精爲魄鄉飲酒義曰象月之三日  
而成魄也

禮中庸篇云武王末受命周公承文武之德追王大  
王王季上祀先公以天子之禮然則武王存日古公  
季歷未嘗稱王皆周公制禮承先追尊而武王克商  
匆匆旬日間與友邦諸侯名分未定輒加祖考王號  
柴望大告不已急乎孔子稱文王至德三分天下有  
二以服事殷奈何伐紂之事動援文考世儒謂禮大

復讐武王雪父怨禮也果若比則夏禹將不得爲孝  
子乎君臣之分等于天地疾風暴雨物逢天扎其若  
天地何父子君臣義與恩敵武成戴記後儒之曲說  
也九年大統未集因于文王十五生武王武王繼世  
不改元之說而附會之文王欲集大統何待九年武  
王雖誅紂而祿父猶封誠不忍果于亡商也必若此  
辭武王之欲代商何其亟乎

予小子其承厥志底商之罪告于皇天后土所過名山  
大川曰惟有道曾孫周王發將有大正于商今商王受  
無道暴殄天物害虐烝民爲天下逋逃主萃淵藪予小

子旣獲仁人敢祇承上帝以遏亂畧華夏蠻貊罔不率  
俾恭天成命肆予東征綏厥士女惟其士女篚厥玄黃  
昭我周王天休震動用附我大邑周

承厥志謂承文王之志也果爾則伐商誅紂皆文王  
之意與武王無預豈其然乎有道曾孫自誇不似聖  
人語逋逃謂罪人亡命者萃聚也魚聚曰淵獸聚曰  
藪仁人謂十亂輩肆予東征以下孟子引書辭舊云  
紹我周王見休惟臣附于大邑周今改爲昭我周王  
天休震動則陋矣武王方告神往伐而先言此無謂  
惟爾有神尚克相予以濟兆民無作神羞旣戊午師渡

孟津癸亥陳于商郊俟天休命甲子昧爽受率其旅若  
林會于牧野固有敵于我師前徒倒戈攻于後以比血  
流漂杵一戎衣天下大定乃反商政政由舊釋箕子囚  
封比干墓式商容閭散鹿臺之財發鉅橋之粟大賚于  
四海而萬姓悅服列爵惟五分土惟三建官惟賢位事  
惟能重民五教惟食喪祭惇信明義崇德報功垂拱而  
天下治

敘事魯拙綴舊語爲文而無次第此儒費解釋訂正  
終不悟其爲厲也漢世有張霸者僞作武成又作他  
書數十篇自孔書出而霸書始廢然以霸易霸千年

無具眼人可笑也

旅葵

舊說武王時西旅之國供大犬召公作旅葵犬高四尺曰葵

惟克商遂通道于九夷八蠻西旅底貢厥葵大保乃作旅葵用訓于王

伏書底字與抵通或訓定或訓致孔書底字專訓致字書云底上無點也

曰嗚呼明王慎德四夷咸賓無有遠邇畢獻方物惟服食器用王乃昭德之致于異姓之邦無替厥服分寶玉

于伯叔之國時庸展親人不易物惟德其物德盛不狎  
侮狎侮君子罔以盡人心狎侮小人罔以盡其力不役  
耳目百度惟貞玩人喪德玩物喪志志以道寧言以道  
接不作無益害有益功乃成不貴異物賤用物民乃足  
犬馬非其土性不畜珍禽奇獸不育于國不寶遠物則  
遠人格所寶惟賢則邇人安嗚呼夙夜罔或不勤不矜  
細行終累大德爲山九仞功虧一簣允迪茲生民保厥  
居惟乃世王

此篇辭義較切狎侮數語亦無謂以召誥律之定知  
此非召公語召誥淵塞而神情溢出此辭句句整齊



揀選甃砌不似召誥天趣恣宕也

微子之命

舊說成王旣殺武庚封微子于宋以奉商祀此其冊命之辭

王若曰猷殷王元子惟稽古崇德象賢統承先王脩其  
禮物作賓于王家與國咸休永世無窮嗚呼乃祖成湯  
克齊聖廣淵皇天眷佑誕受厥命撫民以寬除其邪虐  
功加于時德垂後裔爾惟踐脩厥猷舊有令聞恪慎克  
孝肅恭神人予嘉乃德曰篤不忘上帝時歆下民祗協  
庸建爾于上公尹茲東夏欽哉往敷乃訓愼乃服命率

由典常以蕃王室弘乃烈祖律乃有民永綏厥位毗予  
一人世世享德萬邦作式俾我有周無斁嗚呼往哉惟  
休無替朕命

語浮汎而少筋骨轉換數字凡命皆可用

### 蔡仲之命

古蔡仲之命亡矣按春秋左傳云管蔡啓商恭間王  
室王于是乎殺管叔而蔡蔡叔以車七乘徒七十人  
其子蔡仲改行帥德周公舉以爲己卿士見諸王而  
命之以蔡其命書云王曰胡無若爾考之違王命也  
後人緣此補亡然左傳謂成王殺叔周公哀其父錄

其子爲請于王近情可信此書直云周公致辟管叔  
爲千古好事之端可恨也餘詳金縢

惟周公位冢宰正百工羣叔流言乃致辟管叔于商  
後儒誤解金縢我之弗辟爲刑辟謂周公致辟管叔  
作僞命誤後世無窮夫言不知其所自起之謂流古  
人立木求謗無故遭謗者多矣雖流言何傷卽成王  
疑公公避則已何遽至甘心于兄此天理人情所必  
無金縢大誥歷歷足據俗儒信聖人不如信僞書可  
怪也餘詳金縢

因蔡叔于郭鄰以車七乘降霍叔于庶人三年不齒

三監雖流言周之宗社未有傷也輒殺一兄囚一弟  
貶一弟周公而爲此遠何以見虞舜近何以對夷齊  
此戰國以來處士之橫議司馬遷無識信爲實錄後  
世薄夫遠謂義可滅親兄可殺弟可誅則是書爲口  
實而周公爲戎首矣鄙儒談經若此奈何不受焚坑  
之報乎後之讀書者可以惕然省矣篇首序事煩瑣  
非三代史筆郭鄰語杜撰猶言郭外附近郊遂云爾  
僞傳以中國外地名附會可哂

蔡仲克庸祗德周公以爲卿士叔卒乃命諸王邦之蔡  
命諸王邦之蔡謂命于王邦然後就封卽篇中侯爾

于東往卽乃封之意孔傳謂叔所封圻內之蔡仲所封又淮汝之間夫蔡惟淮汝而已篇內所云皆歸國語非如後世關內侯之比也傳特以其爲周公卿士附會之然未有冢宰官屬用諸侯者也始嘗爲公卿士後旣受封焉得謂命之圻內之蔡不歸淮汝乎按禮天子之卿大夫士未分封者受地圻內惟周公留相王室伯禽歸魯公仍食邑于周則稱周公若蔡叔封蔡已就外藩惟朝覲或有邱第在京師而旣得罪則併蔡邱亦當削除矣況復有王邦之蔡邑可以命其子者乎苟命辭如傳所釋其爲後人猜度附會

愈明矣

王若曰小子胡惟爾率德改行克慎厥猷肆予命爾侯  
于東土往卽乃封敬哉爾尚蓋前人之愆惟忠惟孝爾  
乃邁迹自身克勤無怠以垂憲乃後率乃祖文王之彝  
訓無若爾考之違王命皇天無親惟德是輔民心無常  
惟惠之懷爲善不同同歸于治爲惡不同同歸于亂爾  
其戒哉慎厥初惟厥終終以不困不惟厥終終以困窮  
懋乃攸績睦乃四鄰以蕃王室以和兄弟康濟小民率  
自中無作聰明亂舊章詳乃視聽罔以側言改厥度則  
予一人汝嘉王曰嗚呼小子胡汝往哉無荒棄朕命

皇天以下語泛

周官

先儒疑周官三公三孤與周禮不合謂周禮爲周公未成之書周官爲成王已試之法不知周官周禮皆非古也不足以相徵

惟周王撫萬邦巡侯甸四征弗庭綏厥兆民六服羣辟罔不承德歸于宗周董正治官王曰若昔大猷制治于未亂保邦于未危

制治于未亂保邦于未危後世語

曰唐虞稽古建官惟百內有百揆四岳外有州牧侯伯

庶政惟和萬邦咸寧夏商官倍亦克用又明王立政不惟其官惟其人

不惟其官惟其人偶然語千古良謨故言不在遠

今予小子祇勤于德夙夜不逮仰惟前代時若訓迪厥官立太師太傅太保茲惟三公論道經邦燮理陰陽官不必備惟其人少師少傅少保曰三孤貳公弘化寅亮天地弼予一人

古名世正己格物如伊尹周公凝亮忠勤職司卽道德民物卽燮理含職分民事外更無有道可論陰陽可燮理者也有如六卿之上更須三公論道燮理不



足又設三孤副之是道與陰陽天地不在政事民物  
中後世清譚之治誤天下蒼生者也

冢宰掌邦治統百官均四海司徒掌邦教敷五典擾兆  
民宗伯掌邦禮治神人合上下司馬掌邦政統六師平  
邦國司寇掌邦禁詰姦慝刑暴亂司空掌邦土居四民  
時地利六卿分職各率其屬以倡九牧阜成兆民六年  
五服一朝又六年王乃時巡考制度于四岳諸侯各朝  
于方岳大明黜陟

一代典制當世自有令甲開載成王訓百官何用瑣  
舉此後人自述記聞以實其所爲周官者耳

王曰嗚呼凡我有官君子欽乃攸司慎乃出令令出行弗惟反以公滅私民其允懷學古入官議事以制政乃不迷

學古入官後世事後世語

其爾典常作之師無以利口亂厥官蓄疑敗謀怠忽荒政不學牆面蒞事惟煩戒爾卿士功崇惟志業廣惟勤惟克果斷乃罔後艱位不期驕祿不期侈恭儉惟德無載爾僞作德心逸日休作僞心勞日拙

漢以後勸學語

居寵思危罔不惟畏弗畏入畏推賢讓能庶官矜和不

和政麗舉能其官惟爾之能稱匪其人惟爾不任王曰  
嗚呼三事暨大夫敬爾有官亂爾有政以佑乃辟永康  
兆民萬邦惟無斁

著意摹古而風骨殊不類或云名理法言豈得盡斥  
爲僞夫予所辨者辭耳理無古今彼所以欺後世者  
惟以辭也

君陳

舊說周公既沒成王命君陳代治洛邑此其策命之  
辭按十亂未有稱君陳者殆周士之後進與成王既  
以東都爲重周公既薨卽宜使召公召公老卽宜舉

公何待君陳卒康王乃更以畢公代君陳乎故可疑也

王若曰君陳惟爾令德孝恭惟孝友于兄弟克施有政命汝尹茲東郊敬哉

論語引書曰書云孝乎惟孝友于兄弟施于有政二語似爲言孝發以爲命官發端之辭不協旣云令德孝恭又云惟孝友于兄弟旣云克施有政又云命汝尹茲東郊語勢雜亂補綴甚明鄭康成以君陳爲周公子附會之豈周公子卒而後命畢公代之乎先新進而後老成非用人之序矣

昔周公師保萬民民懷其德往慎乃司茲率厥常懋昭  
周公之訓惟民其乂我聞曰至治馨香感于神明黍稷  
非馨明德惟馨爾尚式時周公之猷訓惟日孜孜無敢  
逸豫凡人未見聖若不克見旣見聖亦不克由聖爾其  
戒哉爾惟風下民惟草

至治馨香以下皆鎔舊語

圖厥政莫或不艱有廢有興出入自爾師虞庶言同則  
繹爾有嘉謀嘉猷則入告爾后于內爾乃順之于外曰  
斯謀斯猷惟我后之德嗚呼臣人咸若時惟良顯哉  
嘉謀入告可也必以歸君此人臣自用之心非人君

所以教臣君喜歸美卽不喜歸過是導之諛也豈賢王之訓

王曰君陳爾惟弘周公丕訓無依勢作威無倚法以削寬而有制從容以和殷民在辟予曰辟爾惟勿辟予曰宥爾惟勿宥惟厥中有弗若于汝政弗化于汝訓辟以止辟乃辟狃于姦宄敗常亂俗三細不宥

三細不宥謂姦宄敗常亂俗三者雖小不宥也凡刑之設孰非以是三者乎無是三者則無刑今不論其情終非終但以三者槩之則罪人之獲宥者少矣矧曰細乎

爾無忿疾于頑無求備于一夫

忿疾于頑因序有遷殷頑民語襲用之周公實未嘗  
詆殷士爲頑也說見多士

必有忍其乃有濟有容德乃大簡厥脩亦簡其或不脩  
進厥良以率其或不良惟民生厚因物有遷違上所命  
從厥攸好爾克敬典在德時乃罔不變允升于大猷惟  
予一人膺受多福其爾之休終有辭于永世

康王之誥

此篇分顧命後半充之自諸侯出廟門俟以上爲顧  
命自出在應門之內以下爲康王之誥按康王出見

羣臣卽在受顧命之時諸侯出廟門俟王出在應門  
內語脉不斷豈可分爲兩篇辭具前不復載

### 畢命

舊說康王命畢公代君陳治東都此其策命之辭也  
惟十有二年六月庚午肫斐越三日壬申王朝步自宗  
周至于豐以成周之衆命畢公保釐東郊

按漢書律歷志云康王畢命豐刑曰惟十有二年六  
月庚午肫王命作冊書豐刑是時古文未出已別有  
畢命矣果孰爲真古書乎其不可盡信如此

王若曰嗚呼父師惟文王武王敷大德于天下用克受



殷命惟周公左右先王綏定厥家。越殷頑民遷于洛邑。  
周公未嘗以殷士爲頑民。附會序謬耳。

密邇王室。式化厥訓。旣歷三紀。世變風移。四方無虞。予  
一人以寧。道有升降。政由俗革。不臧厥臧。民罔攸勸。惟  
公懋德克勤。小物弼亮。四世正色。率下罔不祇師。言嘉  
績多于先王。予小子垂拱仰成。王曰。嗚呼。父師。今予祇  
命公以周公之事。往哉。旌別淑慝。表厥宅里。彰善癉  
惡。樹之風聲。弗率訓典。殊厥井疆。俾克畏慕。申畫郊圻。  
愼固封守。以康四海。

密邇王室。東郊近王城也。十二年曰紀懋德茂。

德也克勤小物能謹細行也四世文武成康也祇  
言敬法其訓也嘉績多于先王美功積累多于先王  
之時也瘡病也禍淫之意殊厥井疆不使與善者同  
處也圻畿通邊界也按正色率下垂拱仰成皆後世  
語畢公輔相四世元老命辭煩瑣不似託重老成人  
語

政貴有恆辭尚體要不惟好異

東漢人語意

商俗靡靡利口惟賢餘風未殄公其念哉我聞曰世祿  
之家鮮克由禮以蕩陵德實悖天道敝化奢麗萬世同

流

世祿之家鮮克由禮後世事後世語

茲殷庶士席寵惟舊怙侈滅義服美于人驕淫矜侈諱  
將由惡終雖收放心閑之惟艱

雖收放心閑之惟艱孟子以後語論政亦迂

資富能訓惟以永年惟德惟義時乃大訓不由古訓于  
何其訓

非歌非贊語語四字氣緩弱

王曰嗚呼父師邦之安危惟茲殷士不剛不柔厥德允  
脩惟周公克慎厥心和厥中惟公克成厥終

后協心同底于道。道洽政治。澤潤生民。四夷左衽。  
咸賴予小子。永膺多福。公其惟時。成周建無窮之基。亦  
有無窮之聞。子孫訓其成式。惟又嗚呼。罔曰弗克。惟旣  
厥心。罔曰民寡。惟慎厥事。欽若先王成烈。以休于前政。  
多辭鮮要。大似訓蒙士。不類託重元老語。

君牙

舊說周穆王以君牙爲大司徒。此其命辭也。

王若曰。嗚呼。君牙。惟乃祖乃父。世篤忠貞。服勞王家。厥  
有成績。紀于大常。

無所指名。而第云乃祖乃父。諱張之言。

惟予小子。嗣守文武成康遺緒。亦惟先正之臣克左右  
亂四方。心之憂危。若蹈虎尾。涉于春冰。

誦四祖之德。云文武成康辭甚簡畧。正是異代語。

今命爾予翼。作股肱心膂。續乃舊服。無忝祖考。弘敷五  
典。式和民則。爾身克正。罔敢弗正。民心罔中。惟爾之中。  
夏暑雨。小民惟曰怨咨。冬祁寒。小民亦惟曰怨咨。厥惟  
艱哉。思其艱。以圖其易。民乃寧。嗚呼。丕顯哉。文王謨。丕  
承哉。武王烈。啟佑我後人。咸以正罔缺。爾惟敬明乃訓。  
用奉若于先王。對揚文武之光命。追配于前人。  
祁大也。禮記緇衣引夏暑雨四句。孟子引丕顯哉四

句皆真古語竄入罅縫宛然

王若曰君牙乃惟由先正舊典時式民之治亂在茲率乃祖考之攸行昭乃辟之有乂

亟言乃祖考既不舉其姓氏又不稱其先勲職事所以爲刃

問命

舊說周穆王以伯冏爲大僕正之命辭也按史穆王非賢君也其父昭王南征不復不能問而使後世霸者借以爲辭車轍馬跡遍天下槃樂之主也夫子刪書以呂刑有仁人之言故存之後世遂僞增君牙伯

問聖人何取于穆王而錄其辭反多于成康乎

王若曰伯冏惟予弗克于德嗣先人宅丕后怵惕惟厲中夜以興思免厥愆昔在文武聰明齊聖小大之臣咸懷忠良其侍御僕從罔匪正人以旦夕承弼厥辟出入起居罔有不欽發號施令罔有不臧下民祇若萬邦咸休

出入起居四語太庸

惟予一人無良實賴左右前後有位之士匡其不及繩愆糾謬格其非心俾克紹先烈

格其非心不似訓臣語尤不似穆王語

今予命汝作大正正于羣僕侍御之臣懋乃后德交脩  
不逮慎簡乃僚無以巧言令色便辟側媚其惟吉士僕  
臣正厥后克正僕臣諛厥后自聖后德惟臣不德惟臣  
爾無昵于憊人充耳目之官迪上以非先王之典非人  
其吉惟貨其吉若時瘝厥官惟爾大弗克祗厥辟惟予  
汝辜王曰嗚呼欽哉永弼乃后于彝憲

按周禮大僕掌正王之服位出入王之大命穆王晚  
年用造父爲御盤遊無度苟僕正得人何至于此滋  
其假託而不核其實故也

尚書辨解卷十終



時萬曆乙卯孟冬京山郝氏刊刻